

**Акафист Пресвятой Богородице
в честь чудотворной иконы
именемой УМИЛЕНИЕ
(Серафимо-Дивеевская)**

Акафист Пресвятой Богородице в честь чудотворной иконы, именемои Умиление

Кондак 1

Избранная от всех родов Заступнице вселенныея, похвальный глас Твоих рабов приемши, Всеблаженная, избави нас от всяких бед, да пред иконою Твою и мы архангельский привет поем усердною душею: Радуйся, всем радостем Ты еси радость, Всеблаженная.

Икос 1

Архангел Божий Гавриил, началовождь небесных сил, предста Тебе, Отроковице, совет превечный открывая и еже “Радуйся” вещая: “Ты Мати будеши, Владычице”. Тому последующе верно, дерзаем вси нелицемерно воспета радостный сей глас Тебе, молящейся о нас:

Радуйся, рождшая Жизнь всем утроба;
радуйся, грешного мира спасение.

Радуйся, Сын Твой воскресе от гроба;
радуйся, Евиных слез избавление.

Радуйся, древняго змия поправшая;
радуйся, узы греха растерзавшая.

Радуйся, радость женам несказанная;
радуйся, Божия милости дверь.

Радуйся, ангелов песнь непрестанная;
радуйся, Богу избранная Дщерь.

Радуйся, твари всея ожидание;
радуйся, грешником всем упование.

Радуйся, всем радостем Ты еси радость, Всеблаженная.

Кондак 2

Видяще образ Твой сей Умиление, токи целебные всем источающий, тепле к нему притекаем смиреннии, в

нуждах и скорбех спасения чающе. Ты же Христа умоли, яко Мати, всяко прошение нам даровати, яко да присно Тому воспоим песнь благодарну пред образом сим: Аллилуиа.

Икос 2

Разум небесный стяжа Серафим, тяжким недугом лежа одержим; Тя бо моляше болезнь исцелити. Ты же, Благая, пришедши во сне, кротце предстала ему в тишине, отроку жизнь обещавши продлити. Темже, от смерти Тобою спасенный, сладце воспес Серафим умиленный:

Радуйся, высшая неба небес;
радуйся, Мати Господня святая.
Радуйся, рождшая бездну чудес;
радуйся, стамно щедрот всезлатая.
Радуйся, Ты бо нам милость являеши;
радуйся, всяку болезнь исцеляеши.
Радуйся, душ и телес врачевство;
радуйся, падших благое возстание.
Радуйся, горних умов торжество;
радуйся, грешников к небу воззвание.
Радуйся, Бога за нас умоляеши;
радуйся, вражию сеть сокрушаеши.
Радуйся, всем радостем Ты еси радость, Всеблаженная.

Кондак 3

Силою Вышняго дивно храним, в силу от силы в душе преспеваще в юности чистей святый Серафим. В храм Пресвятыя усердно хождаше и, умиленно молитву творя, сердцем хвалу во псалмех восписуя, Бога всещедраго благодаря, присно пояше Ему: Аллилуиа.

Икос 3

Имея Тя спутницу верную в жизни, остави избранник Твой юный отчизну, в обитель Саровскую путь направляя. Слагая бо в сердце Твоя словеса, отчество мняше свое небеса, пустынных живот на земли ублажая. И, слышав: “От нашего рода есть сей”, Тебе воспеваще, надежде своей:

Радуйся, веры звездо путеводная;
радуйся, Кормчия жизни моей.
Радуйся, спутнице, к Богу доходная;
радуйся, крове от бури страстей.
Радуйся, к Богу бо нас управляеши;
радуйся, душу спасти вразумляеши.
Радуйся, правды стезе незаблудная;
радуйся, мосте, горе возводяй.
Радуйся, нищим Помощнице чудная;
радуйся, венче, сердца веселяй.
Радуйся, в Царствие нас призываеши;
радуйся, двери рая отверзаеши.
Радуйся, всем радостем Ты еси радость, Всеблаженная.

Кондак 4

Бури житейских скоро спасает Божия Мати вдовицу блаженную, жребий вручити ей Свой обещает, землю возделати благословенную. Темже, Пречистыя воли послушна, в путь неизвестный отходит вдовица, претерпевающи вся благодушно, дондеже в жребий святый водворится, Девы глагола в терпении ждущи, Богу же Сыну прилежно поющи: Аллилуia.

Икос 4

Глыща вдовица глагол долгожданный, в тонцем дремании ей провещанный: “Зде есть в Дивееве место Мое, где есть Мой жребий четвертый избранный, где ты положиши кости твоя, девам пристанище прежде создавши”. Темже вдовица, от ложа воставши, Матери Света за радость светлою светло поет похвалу таковую:

Радуйся, света обитель блаженная;
радуйся, Богом избранный удел.
Радуйся, скиние Бога священная;
радуйся, добрых сокровище дел.
Радуйся, милости море безбрежное;
радуйся, душтишино безмятежная.

Радуйся, вдов к чистоте окормление;
радуйся, девства сосуде драгий.
Радуйся, в старости сил укрепление;
радуйся, в юности жезле благий.
Радуйся, Дево Марие нетленная;
радуйся, Господом благословенная.
Радуйся, всем радостем Ты еси радость, Всеблаженная.

Кондак 5

Божией Матери гласу внимающи храм Ея имени вдова созидает; малое стадо сирот собирающи во благочестии тех возвращает. Тако в Дивееве Божие семя в добрую землю вложися во время, плод же в терпении свой принесе, яко да мы от плода днесь вкушающе, Мать Благую Творца небесе благодарим, о Ней песнь воспевающе: Аллилуя.

Икос 5

Видивше первоначальница мати, яко обитель начат возрастати Девы Марии словес в исполнение, малое стадо свое поручает старцем Саровским и мудро вверяет паству духовное все окормление. И, преспевающи в жизни своей, благо дарящи источник чудес Деву Марию за помощь с небес, песни слагает похвальные Ей:

Радуйся, тихая наша отрадо;
радуйся, имя Тебе — Умиление.
Радуйся, Мати словеснаго стада;
радуйся, места сего прославление.
Радуйся, нам бо покров простираеши;
радуйся, нас ко Христу собираеши.
Радуйся, девам Ты светлый чертог;
радуйся, сирых от бед ограждаеши.
Радуйся, Тя бо послушает Бог;
радуйся, плачущих всех утешение.
Радуйся, немощи наша терпящая;
радуйся, нас во благих богатящая.
Радуйся, всем радостем Ты еси радость, Всеблаженная.

Кондак 6

Бысть проповедница милости всех в своем житии
Александра честная, Божие Имя всегда во устех, в сердце
и мысли молитва святая. Слезные токи Тебе, приношаще, Тя,
Живоносный Источниче, чтуши, труд же дневный неустанно
творяще, духом горяще и Богу поюще: Аллилуиа.

Икос 6

Розсиявающи свет благодати в дивном Дивееве, Божия
Мати Свой омофор простирает над ним, козни врага и
наветы людския, немощи духа и страсти плотския, нужды
обычныя людем земным, — вся утоляет Царица благая, скоро
Своим сиротам помогает. Темже, поюще Тоя чудеса,
радостно рцем Ей сия словеса:

Радуйся, свете спасения благостный;
радуйся, чистых сердец красото.
Радуйся, совести мire, всем сладостный;
радуйся, духа любве широто.
Радуйся, цветниче благоухающий;
радуйся, жезле, враги устрашающий.
Радуйся, в немощи помощь всесильная;
радуйся, в скорби утехо с небес.
Радуйся, в скучности пище обильная;
радуйся, вышшая всяких словес.
Радуйся, Божий бо гнев утоляеши;
радуйся, милость на нас призываеши.
Радуйся, всем радостем Ты еси радость, Всеблаженная.

Кондак 7

Хотячи оставить мир сей растленный, блаженная вкупе
сирот собирает и Матери Бога удел, ей врученный,
Пахомия старца блюсти умоляет; Пречистыя образ на перси
приемлет и в руце Владычицы дух предает. Исполненный
скорби Пахомий ей внемлет и песнь ей надгробную сице
поет: Аллилуиа.

Икос 7

Новый Дивееву ангел-хранитель, жребия Девы и дев устроитель, послан Пречистою бысть Серафим. Купно с прехвальным Петром, с Иоанном, в келии Дева предста несказанно, светлая, с мучениц ликом святым, благоухающи миром небесным. “Дев ты Моих не остави”, — вещает; помочь ему по вся дни обещает, он же приносит Ей дар свой словесный:

Радуйся, славо пророков прекрасная;
радуйся, крине удолий рая.
Радуйся, мучениц песнь велегласная;
радуйся, стершая слезы моя.
Радуйся, грешных молитв не забывшая;
радуйся, сирых Твоих посетившая.
Радуйся, наша пред Сыном Споручнице;
радуйся, с Богом принесшая мир.
Радуйся, душ Жениховых Обручнице;
радуйся, двернице званым на пир.
Радуйся, тайны от века явление;
радуйся, Дево, Тебе мое пение.
Радуйся, всем радостем Ты еси радость, Всеблаженная.

Кондак 8

Странных видений причастник блаженный, благостный старец отец Серафим к сердцу приемлет завет незабвенный Девы Марии и, Ею водим, девам обитель особую строит; меру соборному храму дает, место святое канавкой обводит, паству Пречистыя верно пасет, правило жизни и чин полагает, Богу неленостно пети внушиает: Аллилуя.

Икос 8

Всеселым умом ся Христу сраспиная, блаженства рая на земли предвкушая, пояше святый, яко благ тех виновней, Марии, родившей нам Спасшаго нас, архангельский Той, еже “Радуйся”, глас прилежно всегда с простотою сыновней. Тому

подражая, Мариин удел доныне обходит свой древний предел, хвалу Богородице Деве поя, да радости будет причастник Тоя:

Радуйся, о Богородице Дево;
радуйся, рождшая Спаса Христа.
Радуйся, Бога вместившая в чрево;
радуйся, плод Твой - нам Путь живота.
Радуйся, радостей вечных виновная;
радуйся, славо и радость церковная.
Радуйся, девственниц чистых венчание;
радуйся, иноков Щедрая Мати.
Радуйся, матерей всех величание;
радуйся, dome, исполнь благодати.
Радуйся, стрелы во дни угашающи;
радуйся, страхи в ноши прогоняющи.
Радуйся, всем радостем Ты еси радость, Всеблаженная.

Кондак 9

Всяких сил ангельских, Дево, превысшую, хвалят
немолчно Тя наша сердца, светлостей солнечных истинно
чистшую, Тя величает вся тварь без конца. Ты же Ходатаица
за нас буди к Сыну и Богу в день страшный суда; грешных
молений тогда не забуди, пети сподоби нас Богу всегда:
Аллилуя.

Икос 9

Витий многогласных не может язык воспети достойно
Твой сладостный лик, о Дево и Мати Владыки небес.
Даров Твоих чудных и сил умножение сердца исполняет росы
умиления, дает очесем всех источники слез. Твой образ
святый ее свещею горящую всегда веселяше взор старца
молящаго, егда на колена склонився пред ним, усердно
хваляше Тя пением сим:

Радуйся, всех безнадежных надеждо;
радуйся, сердцу росо умиления.
Радуйся, правды лишенных одеждо;

радуйся, всем нам источник спасения.
Радуйся, демонский лик низлагаеши;
радуйся, грозно бесам запрещаеши.
Радуйся, духом унылых возстание;
радуйся, палице спящим во зле.
Радуйся, стропотных душ наказание;
радуйся, вся бо возможна Тебе.
Радуйся, в горьких работах всем сладость;
радуйся, Мати, скорбящим всем радость.
Радуйся, всем радостем Ты еси радость, Всеблаженная.

Кондак 10

Спасительно постными сеяв слезами, ждет в радости старец от Девы вещание: “Ты скоро, любимиче, будеши с нами”. И духом покоен, в живом упованиях, отход свой от мира предуготовляет. Устав свой молитвенный и наставления хранити сирот своих он поучает: от днесъ вам Благая едина хранение; вы многия пестуны имате, чада, отец же не будет разве мене, на гробе моем ищите отрады, и в нуждах и в скорбех идите ко мне; и верую, даст вам Господь утешение, да присно восходит от вас Ему пение: Аллилуиа.

Икос 10

Стена еси девам, Пречистая Дево, от вражиих козней, от нужды и гнева, Тебе бо вручи нас святый Серафим. И в час испытания дух наш смятенный к Тебе мы возносим в молитве смиренней: о буди помощница сирым Твоим; да весело хвалим Тя, присноблаженную, всемирную славу, хвалу неизменную:

Радуйся, верных Твоих утверждение;
радуйся, крепкая сирых стено.
Радуйся, Церкве святыя хваление;
радуйся, горним умом глубино.
Радуйся, цвете наш неувядаемый;
радуйся, граде, Царя прославляемый.
Радуйся, лествице, к Богу возведшая;

радуйся, облаче легкий Христов.
Радуйся, росо руно произведшее;
радуйся, всем Ты готовый покров.
Радуйся, наша надеждо известная;
радуйся, дев похвало неневестная.
Радуйся, всем радостем Ты еси радость, Всеблаженная.

Кондак 11

Пение всякое днесь побеждается множеством благодеяний Твоих; милость Твоя на весь мир простирается, славо небесных и радость земных. Гласа бо Матери богоприятного Сын Твой послушает, Дево, всегда. Радость всем радостем Ты, Благодатная, — звати мы не умолчим никогда. Тако бо зваше Тебе преподобный, Богу пая, наш представитель загробный: Аллилуия.

Икос 11

Света открыся чертог вожделенный старцу, в молитве к Тебе восхищенну, Дево, пред образом сим Умиления. В руце пречистей душу святую Ты восприяла еси — во иную жизнь безконечную в райских селениях. Плакаху чада, отца их лишенная, новым же знанием умиленная милости к старцу Твоей, растворяюще слезы надгробныя песнею красною, Тя величаху хвалою согласно, Матью едину Тебе разсмотряюще:

Радуйся, темных власти стенание;
радуйся, праведных душ торжество.
Радуйся, вратников ада рыдание;
радуйся, Тя бо поет естество.
Радуйся, князя мытарств низложившая;
радуйся, демонов гордость смирившая.
Радуйся, имя, святым вожделенное;
радуйся, в смертный помощниче час.
Радуйся, радость нам неизреченная;
радуйся, в час той услыши наш глас.
Радуйся, наших сердец умиление;

радуйся, Бога умилостивление.

Радуйся, всем радостем Ты еси радость, Всеблаженная.

Кондак 12

Благодатный залог в ограждение, чадом дивеевским старец
остави образ Пречистыя сей Умиления. Сам же пресветло
ликуя во славе, Мать Небесную молит усердно сирых его
соблости милосердно, да не воздремлют уныния сном, но да,
елеем свещу напояюще, внидут в чертог со своим Женихом,
вечную ангелов песнь воспевающе: Аллилуия.

Икос 12

Поем днесь Твою Богородице, славу и милость ко
грешным, на бесы державу; вси празднуем светло Твоя
чудеса. Безмерно Тя всю освятив, непорочная, Бог людем
постави Тя в крепость всемощную: Тебе бо внимают Того
ушеса. Тобою спасаеми вси ежечасно, приносим Ти песнь
тakovую согласно:

Радуйся, жизни сокровище вечных;
радуйся, правды ковчеже святый.

Радуйся, людем хвало бесконечная;
радуйся, свещниче веры златый.

Радуйся, Божие благоволение;
радуйся, всех человеков спасение.

Радуйся, мученик всех дерзновение;
радуйся, песнь преподобных Твоих.

Радуйся, праведных жен украшение;
радуйся, краю желаний благих.

Радуйся, церкве хоругвь пречестная;
радуйся, грешным нам Мати благая.

Радуйся, всем радостем Ты еси радость, Всеблаженная.

Кондак 13

О Мати всепетая, всем во спасение дажь, Всеблагая,
сердец умиление. Да, Божиим страхом всегда
ограждаемы, избегнем губительных сетей борца, и тако
Твоими мольбами спасаеми, во веки восхвалим благаго
Творца: Аллилуия.

Этот кондак читается трижды, затем Икос 1 и Кондак 1.

**Молитва Пресвятой Богородице перед Ея иконой,
именуемой “Умиление”**

Приими, всеблагомощная, Пречистая Госпоже, Владычице Богородительнице, сия честныя дары, Тебе единей прикладныя, от нас, недостойных рабов Твоих: от всех родов избранная, всех тварей небесных и земных высшая явльшаяся, понеже бо Тебе ради бысть Господь Сил с нами, и Тобою Сына Божия познахом и сподобихомся святаго Тела Его и пречистыя Крове Его; темже блаженна еси в родах родов, Богоблаженная, херувимов светлейши и серафимов честнейши сущая. И ныне, всепетая Пресвятая Богородице, не престай молящися о нас, недостойных рабех Твоих, еже избавитися нам от всякаго совета лукаваго и всякаго обстояния и сохранитися нам неврежденным от всякаго ядовитаго прилога диавольскаго; но даже до конца молитвами Твоими неосужденных нас соблюди, яко да Твоим заступлением и помошью спасаеми, славу, хвалу, благодарение и поклонение за вся в Троице Единому Богу и всех Создателю возсылаем, ныне и присно, и во веки веков. Аминь.

**Тропарь Пресвятой Богородице перед Ея иконой,
именуемой “Умиление”**

Тропарь, глас 4

К Богородице со умилением припадем, вси грехми обремененнии, чудотворную Ея икону Умиление облобызающе и вопиюще со слезами: Владычице, приими моление недостойных раб Твоих и подаждь нам, просящим, велию Твою милость.

Величание

Геличаем Тя, Пресвятая Дево, Богоизбранная Отроковище, и чтим образ Твой святый, имже точиши исцеления всем с верою притекающим.